

新修曲沃縣志

知曲沃縣事前翰林院庶吉士武威張兆衡纂輯

史家遺法首記大事三千餘年如表可識予黃屢經黑白
儻易孰莫丕基萬民永苾倣漢東觀大事記而歷代之興
廢沿革附焉志大事第四

沿革 唐虞夏雖皆都冀而曲沃不過納銍納秬之地商封
豕韋尤荒略不可攻而史遷年表昉於叔虞之封予
卽本之以志沿
革蓋其慎也

新修曲沃縣志

卷之四

沿革

一

周成王九年封弟叔虞於唐爲唐侯都唐城

唐城晉有三一在岳陽縣東北相傳

堯所封處一在太原縣龍山晉水所出今山麓有
晉祠祀唐叔而翼城西有古唐城卽叔虞所都也子燮父

遷於翼因南有晉水改國號晉傳子武侯寧族

按竹書紀年康王九年唐遷於晉作宮而美王使人讓之

豈有讓其作宮而聽其改號者據左傳穆侯稱晉孝侯稱

翼孝侯子卻又稱鄂似左氏亦從地追書而從前亦未必

有定名也至魯莊公十六年釐王使虢公命曲沃伯以一

軍爲晉侯由是號稱晉國子孫世守厥後晉文晉悼人國

之初皆朝武宮儼然以莊伯爲太祖矣故國史編詩必稱

舊號亦猶盤庚改號為殷而相土之成湯不稱殷而稱商名義之際不可不辨也

晉成侯南徙曲沃

漢鄭康成詩譜至曾孫成侯徙居曲沃近平陽焉朱子詩集傳本之而應劭詁注為

聞喜自此無知曲沃之所在者矣

歷厲靖僖獻五世都此

晉穆侯遷絳

絳故城在今翼之東南三十五里非今絳州絳縣也

歷殤叔文侯二世都

此

周平王二十六年晉昭侯立遷於翼

在今縣東故城村晉水之上

封其叔父

成師於曲沃是為曲沃桓叔詩人為賦揚水椒聊

左傳初晉穆侯之夫人姜氏以條之役生太子命之曰仇

新修曲沃縣志

卷之四

沿革

二

其弟以千畝之戰生命之曰成師師服曰異哉君之名子

也夫名以制義義以出禮禮以體政政以正民是以政成

而民聽易則生亂嘉耦曰妃怨耦曰仇古之命也今君命

太子曰仇弟曰成師始兆亂矣兄其替乎惠之二十四年

晉始亂故封桓叔於曲沃靖侯之孫欒賓傳之師服曰吾

聞國家之立也本大而末小是以能固故天子建國諸侯

立家卿置側室大夫有貳宗士有隸子弟庶人工商各有

分親皆有等衰是以民服事其上而下無覬覦今晉甸侯

也而建國本既弱矣其能久乎惠之三十年晉潘父弑昭

侯而納桓叔不克晉人立孝侯惠之四十五年曲沃莊伯
伐翼弒孝侯翼人立其弟鄂侯鄂侯生哀侯哀侯侵陘庭
之田陘庭南鄙啟曲沃伐翼魯隱公五年曲沃莊伯以鄭
人邢人伐翼王使尹氏武氏助之翼侯奔隨曲沃叛王秋
王命虢公伐曲沃而立哀侯於翼六年翼九宗五正墳父
之子嘉父逆晉侯於隨納諸鄂晉人謂之鄂侯桓公三年
春曲沃武公伐翼次於陘庭韓萬御戎梁宏爲右逐翼侯
於汾隰驂絰而止夜獲之及欒共叔八年春滅翼莊公十
六年王使虢公命曲沃伯以一軍爲晉侯

新修曲沃縣志

卷之四 沿革

三

按小序揚水椒聊刺晉昭也曲沃強盛國人將叛而歸沃
似不合當日情事據左氏傳潘父事昭侯迎桓叔晉人發
兵攻桓叔桓叔敗歸曲沃其後莊伯弒孝侯於翼翼人復
攻莊伯及武公誘小子侯殺之晉復立哀侯弟緡亦可見
晉人忠義始終不與亂豈當昭侯時遂欲叛而歸沃乎蓋
二詩憂曲沃之強皆忠於昭侯者所作也不敢告人其意
正深於告者若真欲從沃而圖其情則此詩不作矣師服
以成師命名卽知其兆亂椒聊之繁衍詩人自有遠識而
彼其之子顯然斥而外之矣

平王三十二年晉潘父弑其昭侯納曲沃桓叔不克

平王四十年曲沃桓叔卒子緡立是為莊伯 攷是年為魯隱元年始入春秋

平王四十七年曲沃莊伯八翼弑其君孝侯

周桓王二年曲沃莊伯以鄭邢之師攻晉侯於翼王命虢公將

兵伐曲沃莊伯退保曲沃

桓王四年曲沃莊伯卒子稱立是為武公

桓王十一年曲沃武公伐翼次於陘庭

桓王十二年曲沃武公弑其君哀侯

桓王十五年曲沃武公誘殺其君小子侯

新修曲沃縣志

卷之四

沿革

四

周釐王二年曲沃武公滅晉弑其君緡

釐王四年曲沃武公以寶器賂王王使虢公命武公以一軍

為晉侯詩人賦無衣

按自桓叔封曲沃歷六十七年至武公稱卒以代晉弑君

滅國有何可美朱子集傳解此詩為晉侯請命之辭惟以

子為天子稍覺未安愚意詩中言子謂虢公以王命命服

來也唐劉仁恭嘗謂使者曰旌節吾自有但要長安本色

爾存此詩所以見釐王之不君晉武之不臣亦春秋傷亂

之意也

釐王五年晉武公卒子獻公佹諸立

周惠王五年獻公伐驪戎獲姬以歸

惠王九年晉始都絳

惠王十二年獻公使太子申生居曲沃

惠王十六年獻公爲太子申生城曲沃是爲新城

按左傳魯莊公二十八年驪姬嬖欲立其子賂外嬖梁五與關東嬖五使言於公曰曲沃君之宗也蒲與二屈君之疆也不可以無主宗邑無主則民不威疆場無主則啟戎心戎之生心民慢其政國之患也若使太子主曲沃而重

新修曲沃縣志

卷之四

沿革

五

耳夷吾主蒲與屈則可以威民而懼戎晉侯說之夏使太子居曲沃重耳居蒲城夷吾居屈而閔公元年傳晉侯作二軍公將上軍太子申生將下軍趙夙御戎畢萬爲右以滅耿滅霍滅魏還爲太子城曲沃則申生之居曲沃當在周惠王十二年閔五年始城曲沃則魯閔公元年也

惠王二十二年晉侯使太子申生祭齊姜於曲沃十二月晉侯將殺太子申生太子縊於新城

左傳驪姬謂太子曰君夢齊姜必速祭之太子祭於曲沃歸胙於公公田姬寘諸宮六日公至毒而獻之公祭之地

地墳與犬犬斃與小臣小臣亦斃姬泣曰賊由太子太子奔新城公殺其傅杜原款或謂太子子辭君必辯焉太子曰君非姬氏居不安食不飽我辭姬必有罪君老矣吾又不樂曰子其行乎太子曰君實不察其罪被此名也以出人誰納我縊於新城姬遂譖二公子曰皆知之重耳奔蒲夷吾奔屈

周襄王二年晉侯

夷吾

立殺其大夫里克改葬恭太子

穀梁傳稱國以殺罪累上也里克弑二君與一大夫其以累上之辭言之何也其殺之不以其罪也其殺之不以其

新修曲沃縣志

卷之四

沿革

六

罪奈何里克所爲弑者重耳也夷吾曰是又將殺我乎故殺之不以其罪也其爲重耳弑奈何晉獻公伐虢得驪姬獻公私之有二子長曰奚齊稚曰卓子驪姬欲爲亂故謂君曰吾夜者夢夫人趨而來曰吾苦畏胡不使夫人將衛士而衛冢乎公曰孰可使曰臣莫尊於世子則世子可故君謂世子曰驪姬夢夫人趨而來曰吾苦畏女其將衛士而往衛冢乎世子曰敬諾築宮宮成驪姬又曰吾夜者夢夫人趨而來曰吾苦飢世子之宮已成則曷爲不使嗣也故獻公謂世子曰其祠世子祠已祠致福於君君田而不

在驪姬以酖爲酒藥脯以毒獻公田來驪姬曰世子已禍
故致福於君君將食驪姬跪曰食自外來不可不試也覆
酒於地而地賁以脯與犬犬死驪姬下堂而啼呼曰天乎
天乎國子之國也子何遲於爲君君喟然歎曰吾與女未
有過切是何與我之深也使人謂世子曰爾其圖之世子
之傅里克謂世子曰入自明入自明則可以生不入自明
則不可以生世子曰吾君已老矣已昏矣吾入自明則驪
姬必死驪姬死則吾君不安所以使吾君不安者吾不若
自死吾寧自殺以安吾君以重耳爲寄矣刎脰而死故里

克所爲弑者爲重耳也夷吾曰是又將殺我也

國語惠公卽位旣殺里克而悔之曰芮也使寡人過殺我
社稷之鎮郭偃聞之曰不謀而諫不忠不圖而殺不祥不
忠受君之罰不祥懼天之禍志道者勿忘將及矣及文公
入秦人殺翼芮而施之

左傳晉侯改葬共太子秋狐突適下國遇太子太子使登
僕而告之曰夷吾無禮余得請於帝矣將以晉畀秦秦將
祀余對曰臣聞之神不歆非類民不祀非族君祀毋乃殄
乎且民何罪失刑乏祀君其圖之君曰諾吾將復請七日

新田西偏將有巫者而見我焉許之遂不見及期而往告之曰帝許我罰有罪矣敝於韓

襄王十五年晉侯夷吾卒秦人納晉侯重耳二月丙午入於

曲沃丁未朝於武宮

襄王二十三年冬十二月己卯晉侯重耳卒

左傳冬晉文公卒庚辰將殯於曲沃出絳柩有聲如牛卜偃使大夫拜曰君命大事將有西師過軼我擊之必大捷焉

焉

周簡王元年晉景公據遷於新田

新修曲沃縣志 卷之四 沿革

左傳晉景公十五年晉人謀去故絳諸大夫皆曰必居郇瑕氏之地沃饒而近鹽國利君樂不可失也韓獻子將新中軍且為僕大夫公揖而入獻子從公立於寢庭謂獻子曰何如對曰不可郇瑕氏土薄水淺其惡易觀易觀則民愁民愁則墊隘於是乎有沈溺重腿之疾不如新田土厚水深居之不疾有汾澮以流其惡其民從教十世之利也夫山澤林鹽國之寶也國饒則民驕佚近寶公室乃貧不可謂樂公說從之夏四月丁丑晉遷於新田

周靈王十五年晉平公彪立烝於曲沃會於淇梁六年樂盈奔

齊

左傳秋欒盈出奔楚宣子殺羊舌虎囚叔向人或謂叔向曰子離於罪其爲不知乎叔向曰與其死亡若何詩曰優哉游哉聊以卒歲智也樂王鮒見叔向曰吾爲子請叔向弗應出不拜其人皆咎叔向叔向曰必祁大夫室老聞之曰樂王鮒言於君無不行求救吾子吾子不許祁大夫所不能也而曰必由之何也叔向曰樂王鮒從君者也何能行祁大夫外舉不棄讐內舉不失親其獨遺我乎詩曰有覺德行四國順之夫子覺者也晉侯問叔向之罪於樂王

新修曲沃縣志

卷之四

沿革

九

鮒對曰不棄其親其有焉於是祁奚老矣聞之乘驛而見宣子曰詩曰惠我無疆子孫保之書曰聖有誓訓明徵定保夫謀而鮮過惠訓不倦者叔向有焉社稷之固也猶將十世宥之以勸能者今壹不免其身以棄社稷不亦惑乎鯀殛而禹興伊尹放太甲而相之卒無怨色管蔡爲戮周公右王若之何其以虎也棄社稷子爲善誰敢不勉多殺何爲宣子說與之乘以言諸公而免之不見叔向而歸叔向亦不告免焉而朝

靈王二十一年晉胥午守曲沃

靈王二十二年晉欒盈復入於曲沃冬十月克欒盈盡殺欒氏

左傳晉將嫁女於吳齊侯使析歸父媵之以藩載欒盈及其士納諸曲沃欒盈夜見胥午而告之對曰不可天之所廢誰能與之子必不免吾非愛死也知不集也盈曰雖然因子而死吾無悔矣我實不天子無咎焉許諾伏之而觴曲沃人樂作午言曰今也得欒儒子何如對曰得主而爲之死猶不死也皆歎有泣者爵行又言皆曰得主何貳之有盈出徧拜之四月欒盈帥曲沃之甲因魏獻子以晝入

新修曲沃縣志

卷之四

沿革

十

絳初欒盈佐魏莊子於下軍獻子私焉故因之趙氏以原屏之難怨欒氏韓趙方睦中行氏以伐秦之役怨欒氏而固與范氏和親知悼子少而聽於中行氏程鄭嬖於公唯魏氏及七輿大夫與之欒王鮒侍坐於范宣子或告曰欒氏至矣宣子懼桓子曰奉君以走固宮必無害也且欒氏多怨子爲政欒氏自外子在位其利多矣既有利權又執民柄將何懼焉欒氏所得其唯魏氏乎而可強取也夫克亂在權子無懈矣公有姻喪王鮒使宣子墨縗冒經二婦人輦以如公奉公以如固宮范鞅逆魏舒則成列旣乘將

逆樂氏矣趨進曰樂氏帥賊以入鞅之父與二三子在君所矣使鞅逆吾子鞅請驂乘持帶遂趨乘右撫劍左援帶命驅之出僕請鞅曰之公宣子逆諸階執其手賂之以曲沃初斐豹隸也著於丹書樂氏之力臣曰督戎國人懼之斐豹謂宣子苟焚丹書我殺督戎宣子喜曰而殺之所不請於君焚丹書者有如日乃出豹而閉之督戎從之踰隱而待之督戎踰入豹自後擊而殺之范氏之徒在臺後樂氏乘公門宣子謂鞅曰矢及君屋死之鞅用劍以帥卒樂氏退攝車從之遇樂樂曰樂免之死將訟女於天樂射之

新修曲沃縣志

卷之四

沿革

十一

不中又注則乘槐本而覆或以戟鉤之斷肘而死樂魴傷樂盈奔曲沃晉人圍之晉人克樂盈於曲沃盡殺樂氏之族黨樂魴出奔宋書曰晉人殺樂盈不言大夫言自外也

周景王十一年晉平公

彪

築虎祁宮

左傳晉成虓祁諸侯朝而歸者皆有二心爲取麇故晉將以諸侯來討叔向曰諸侯不可以不示威乃並徵會告於吳秋晉侯會吳子於良水道不可吳子辭乃還七月丙寅治兵於邾南甲車四千乘羊舌鮒攝司馬遂合諸侯於平

邱

周貞定王十一年晉出公錯告齊魯伐四卿四卿反攻之公出奔齊死於道

史記晉世家出公十七年知伯與趙韓魏共分范中行地以爲邑出公怒告齊魯欲以伐四卿四卿恐遂反攻出公奔齊道死故知伯乃立昭公會孫驕爲晉君是爲哀公哀公四年趙襄子韓康子魏桓子共殺知伯盡並其地十八年哀公卒子幽公柳立幽公之時晉畏反朝韓趙魏之君獨有絳曲沃餘皆入三晉十五年魏文侯初立十八年幽公淫婦人夜竊出邑中盜殺幽公魏文侯以兵誅晉亂立

新修曲沃縣志

卷之四 沿革

七

幽公子止是爲烈公

周考王二年幽公柳立朝於韓趙魏晉獨有絳曲沃

周威烈王二十三年晉烈公止命大夫魏斯趙籍韓虔爲諸侯

綱目托始於是年

周安王二十六年三晉共廢其君俱酒爲家人而分其地曲沃

屬魏

按烈公子爲孝公順在位十五年卒於周安王二十四年

而靖公俱酒立閱二年而至安王二十六年綱目大書二

十六年三晉共廢其君爲家人而分其地乃史記竹書載

晉孝公頎爲晉桓公其十年卽安王十九年韓趙魏分晉而封晉君以端氏至二十年爲烈王六年魏惠王與趙成侯韓共侯奪端氏遷之屯留此後更無晉事較綱目早六
年古籍散亡傳聞各異無從攻其是非也

梁惠王元年魏公叔痤將兵與韓趙戰澮北禽趙將樂祚

九年魏敗韓趙之師於澮

四十九年秦伐魏取曲沃平周

戰國志秦伐魏取曲沃平周陳軫合三晉而東謂齊王曰
今秦欲攻梁絳安邑秦得絳安邑必東攻齊齊無所出其

新修曲沃縣志

卷之四

沿革

三

計矣今三晉已合出銳師以戍梁絳安邑此萬世之計也
齊非急以銳師合三晉必有後憂三晉合秦必不敢攻梁
必南攻楚秦楚構難三晉怒齊不與已也必東攻齊此臣
之所謂大憂也齊王諾以兵合三晉

魏襄王五年秦伐魏取曲沃

魏昭王六年秦魏冉伐魏入河東

秦始皇帝二十六年分天下爲三十六郡曲沃仍爲絳縣屬河

東郡

按沃史載改曲沃爲左邑屬河東郡其言大謬考漢書武

帝紀元鼎六年將幸緱氏至左邑桐鄉聞南越破以爲聞
喜縣春至汲縣中鄉得呂嘉首以爲獲嘉縣班氏地理志
河東郡縣二十四左邑聞喜絳並列焉而應劭遂解聞喜
今曲沃也夫聞喜秦名左邑漢武帝於此改爲聞喜是明
明以左邑之桐鄉爲聞喜非改左邑爲聞喜縣也奈何並
今曲沃亦以爲聞喜縣乎如以左邑爲聞喜則汲縣亦爲
獲嘉矣輾轉仍訛旣以曲沃在聞喜而桓叔之所封韓宣
子之所營恭世子之所城罔不變易山川以遷就後儒之
陋說嗚乎傾矣

新修曲沃縣志

卷之四

沿革

古

漢高帝 年置絳屬河東郡

漢儒子嬰初始元年莽篡位邑入於新

漢更始元年漢兵誅莽邑復歸漢

更始二年遣尙書僕射鮑永安集河東

漢光武皇帝建武元年鄧禹擊定河東改絳縣爲絳邑縣仍隸
河東郡

漢靈帝中平五年黃巾餘黨寇河東

漢獻帝建安七年袁尙遣郭援高幹徇河東攻絳邑所經城邑
皆下惟絳邑長賈逵堅守不能拔攻之亟與約無害逵乃

降

陳壽三國志賈逵傳字梁道河東襄陵人也自爲兒童戲弄常設部伍祖父習異之曰汝大必爲將率口授兵法數萬言初爲郡吏守絳邑長郭援之攻河東所經城邑皆下逵堅守援攻之不拔乃召單于並軍急攻之城將潰絳父老與援要不害逵絳人旣潰援聞逵名欲使爲將以兵劫之逵不動左右引逵使叩頭逵叱之曰安有國家長吏爲賊叩頭援怒將斬之絳吏民間將殺逵皆乘城呼曰負要殺我賢君寧俱死耳左右義逵多爲請遂得免初逵過皮

新修曲沃縣志

卷之四

沿革

五

氏曰爭地先據者勝及圍急知不免乃使人間行送印綬歸郡且曰急據皮氏援旣並絳衆將進兵逵恐其先得皮氏乃以他計疑援謀人祝與援於是留七日郡從逵言故得無敗

建安二十五年魏主曹丕禪位邑入於魏

魏陳留王咸熙二年魏亡邑屬於晉屬平陽郡隸司州

東晉元帝建武元年洛陽守將趙固河內太守郭默攻漢劉聰於河東至於絳邑

晉安帝隆安二年魏主珪稱皇帝邑屬後魏

魏道武帝天興五年擊秦王姚興於蒙阮

北史道武帝天興五年秦王姚興大發諸軍遣義陽公姚平將以伐魏魏主率步騎三萬逆擊興於蒙阮之南興晨行北引未及安營魏主軍卒至興衆怖擾魏主詔毘陵王順以精騎衝擊獲興尚書左僕射狄伯支以下四品將軍以上四百餘人甲騎數百斬首千餘級

魏孝文帝太和十一年復置曲沃縣屬正平郡隸東雍州

魏文帝大統三年宇文泰伐魏略定汾絳

北齊文宣帝天保元年齊主洋稱皇帝邑屬於齊

新修曲沃縣志

卷之四

沿革

六

北周建德五年周主屯於汾曲遣兵攻晉州克之邑屬於周

後周書北齊武平七年周建德五年周主屯於汾曲遣兵

攻晉州克之分遣諸軍徇齊諸城鎮並相次降款齊主自

并州來援圍晉州宇文憲遣越王盛尉遲迴宇文神舉等

由涑水馳至晉州自進軍據蒙阮爲其後援周主自汾曲

帥師救晉州次於高顯令憲先向晉州初齊恐周師卒至

於城南穿塹自橋山屬於汾水周主率軍六萬人置陣東

西二十餘里齊主亦於塹北列陣申後齊人填塹南引周

主大喜勒諸軍擊之齊主與淑妃奔高梁遂北馳周主入

平陽

建德七年城沒於澮

周明帝六年移縣治於樂昌堡屬絳州

隋文帝開皇三年曲沃屬絳州治在樂昌

文帝開皇十一年遷縣治於新城卽今縣城也

唐太宗貞觀元年分天下爲十道曲沃屬絳州隸河東道

太宗貞觀十年置十道府兵設新田神泉二府於曲沃

唐高宗永徽元年崔襲合曲沃開水利以溉田

唐睿宗景雲二十一年分天下爲十五道置採訪使曲沃屬河

新修曲沃縣志

卷之四

沿革

七

東道

唐昭宗天復元年春二月朱全忠取晉絳等州

昭宗天復二年春二月李克用遣兵逼晉絳朱全忠遣兵擊

之

唐昭宣帝天祐四年帝遜位於朱全忠曲沃屬梁

梁開平三年周德威攻晉州詔揚師厚往救德威以騎扼蒙阮

之險師厚擊敗之進抵晉州晉兵解圍去

梁均王龍德三年梁亡曲沃屬後唐

後唐清太三年唐亡曲沃屬後晉

後晉出帝開運三年晉亡四年春二月劉智遠稱帝於晉陽改國號曰漢曲沃屬後漢

五代史高祖天福十二年五月晉主智遠發太原出晉絳將赴洛有司奏置頓厄口鎮帝惡其名別路至聞喜縣從騎由厄口者多爭道墮絕壑

後漢隱帝乾佑三年漢亡曲沃屬後周

五代史太祖廣順元年劉崇攻晉州王峻率兵拒之軍出絳州晉州南有蒙阮之險峻憂爲漢兵所據聞前鋒已度乃喜北軍乏食夜遁

新修曲沃縣志

卷之四 沿革

六

後周恭帝元年周亡曲沃歸於宋

宋太祖建隆元年曲沃屬絳郡防禦隸河東路

宋仁宗慶歷四年詔立學校

宋欽宗靖康二年金人陷河中府曲沃入於金

金太宗天會六年曲沃屬絳州隸絳陽軍節度使

太宗興定二年曲沃屬晉安府

太宗興定三年分河東置南北二路曲沃屬南路領紫村九王二鎮邑人靳和以所部歸蒙古分澮水爲界南屬金北屬蒙古

金哀宗天興三年金亡邑屬於元

元世祖至元六年曲沃屬絳州隸平陽路命朶而只監曲沃

元成宗大德九年以地震罷絳爲州曲沃屬平陽路改隸晉寧

路

明太祖洪武元年冬十二月副將馮宗異取晉寧路

太祖洪武二年改晉寧路爲平陽府以曲沃隸之

太祖洪武八年立蒙城侯馬二驛於曲沃

明憲宗成化二十一年濬感夢泉分景明水利

明武宗正德五年流賊楊虎等犯蒙城

新修曲沃縣志

卷之四

沿革

九

明懷宗崇禎十六年流賊李自成窺晉巡撫蔡懋德置防河兵

歸至平陽立干城社時邑人賈漢復亦立保障社爲守禦

計

崇禎十七年春正月李自成陷曲沃二月驅民運米豆銅布

諸物於蒲解交納

論曰晉自翦桐啟宇以來七百九十九年而曲沃爲必爭之地

成師耦國歷再傳而翼以滅欒盈絕宗入三卿而晉以分得失

之故略可見矣漢高帝削平大難仍秦三十六郡之舊而又增

置六十三郡文景而後多所剏建曲沃夷爲縣鄙迺入晉未幾

而劉淵而石勒而冉閔而慕容恪而苻堅而慕容冲慕容垂凡九十餘年七易其主隋唐統一凌夷至於五代而後梁而後唐而後晉而後漢後周凡四十餘年餘年五易其主民生其時尚可問乎逮宋陷於金元擾於偽宋關先生前明少息已而流賊李自成破之叛鎮姜瓖復破之自非

大聖人孰克拯民於水火哉日月出而燭火熄雨露降而羣卉蘇曩之蛙爭蠻觸銷除盡矣迄今周覽遺墟漠然徒見山高而水清此則可爲曲沃幸者也嗚乎寧獨沃之幸哉

